

DASAR KESAMARATAAN DAN PERLINDUNGAN KE ATAS WARGA UNIMAS DARI SEGI JANTINA, AGAMA, BANGSA DAN USIA

1.0 PENDAHULUAN

- 1.1 Pelaksanaan dan perjalanan urusan di dalam Universiti Malaysia Sarawak (UNIMAS) adalah berlandaskan kepada Undang- Undang, iaitu Perlembagaan Persekutuan 1957 dan diikuti juga dengan pematuhan undang- undang subsidiari seperti Akta Universiti & Kolej Universiti (AUKU) 1971 termasuklah Perlembagaan Universiti Malaysia Sarawak (1998) dan Akta Badan-Badan Berkanun [Tatatertib & Surcaj] 2000 (Akta 605).
- 1.2 Segala peraturan, polisi, dasar dan sebagainya yang diterimapakai di UNIMAS hendaklah selaras dan tidak bertentangan dengan Perlembagaan Persekutuan 1957. Jika mana- mana peraturan, polisi, dasar dan sebagainya yang berkuatkuasa di dalam UNIMAS adalah bercanggah atau bertentangan dengan Perlembagaan itu, maka peraturan, polisi, dasar dan sebagainya yang berkuatkuasa di UNIMAS menjadi terbatal atau tidak sah setakat mana yang bercanggah atau bertentangan itu. (*ultra vires*)

2.0 LATAR BELAKANG

- 2.1 Kepentingan Perlembagaan dalam konteks pembinaan sesebuah negara bangsa adalah dari segi integrasi, nasionaliti, nasionalisme, patriotisme dan demokrasi yang mana pelaksanaannya melalui Wawasan 2020, Islam Hadhari dan konsep 1 Malaysia. Perlembagaan Persekutuan adalah undang-undang utama dan tertinggi Persekutuan dan apa-apa undang-undang yang diluluskan selepas Hari Merdeka yang tidak selaras dengan Perlembagaan ini, adalah tidak sah setakat ketidakselarasan itu atau undang-undang atau peraturan negeri, dasar pemerintah negeri.
- 2.2 Terdapat dua (2) jenis bentuk Perlembagaan iaitu bertulis yang merujuk kepada bentuk Perlembagaan yang dikumpul dan dibentuk menjadi satu dokumen dan tidak bertulis yang merupakan semua prinsip perlembagaan yang tidak terkumpul dalam satu dokumen seperti undang- undang adat.



3. PENYATAAN DASAR

- 3.1 UNIMAS merupakan salah satu daripada dua puluh (20) Institusi Pengajian Tinggi Awam (IPTA) dan ianya adalah Badan Berkanun Persekutuan bagi memastikan sesuatu dasar Kerajaan Persekutuan termasuklah Dasar kerajaan yang menjaga hak masyarakat berbilang kaum, agama, umur dan jantina secara sama rata dan melindungi masyarakat daripada sebarang ketidakadilan dan berat sebelah, dapat dilaksanakan dengan lebih efektif.
- 3.2 Penubuhan UNIMAS tertakluk kepada Akta Tubuh yang memperbadankannya (melalui Undang-Undang Pemberbadanan) dan berfungsi mengikut tujuan, sepertimana yang diperuntukkan di bawah Akta Universiti & Kolej Universiti (AUKU) 1971 termasuklah Perlembagaan Universiti Malaysia Sarawak (1998) dan Akta Badan-Badan Berkanun [Tatatertib & Surcaj] 2000 (Akta 605) beserta dengan pindaannya, sebagai undang-undang utama. Secara praktis, UNIMAS masih lagi tertakluk kepada dasar-dasar Kerajaan (Pihak Berkuasa Persekutuan).
- 3.3 UNIMAS amat menekankan prinsip hak kesamarataan bagi mengelakkan berlakunya diskriminasi dan ketidakadilan kepada rakyat seterusnya dapat menegakkan hak asasi manusia. Hak kesamarataan dapat dilihat dari pelbagai aspek termasuklah agama, bangsa, keturunan, tempat lahir dan jantina. Hak ini diiktiraf sebagai salah satu kebebasan asasi yang termaktub di dalam Perlembagaan Persekutuan.

4 TAKRIFAN

Merujuk kepada Dasar ini, melainkan maknanya menghendaki makna konteks yang lain;

“**Agama**” ertinya kepercayaan kepada Tuhan dan sifat-sifat serta kekuasaan Tuhan dan penerimaan ajaran dan perintahNya dan kepercayaan pada yang Maha Kuasa;

“**Akta**” ertinya Akta atau Akta Parlimen digunakan bersamaan dengan perundangan, yang membawa maksud undang-undang yang diperbuat oleh Parlimen.

“**Badan Berkanun**” ertinya suatu badan, walau dengan nama apa pun disebut, yang diperbadankan





oleh undang-undang persekutuan bagi maksud Kerajaan Persekutuan, tetapi tidak termasuk pihak berkuasa tempatan;

“**Dasar**” ertinya asas, teras, panduan, aturan atau satu bentuk pelan tindakan bagi mencapai objektif untuk kepentingan negara, agensi, unit, pihak tertentu atau masyarakat;

“**Diskriminasi**” ertinya perlakuan membeza-bezakan sesuatu hal (kerana keturunan, warna kulit dan lain- lain:

“**F/I/B/P**” ertinya Pusat Tanggungjawab seperti Fakulti, Institut, Bahagian atau Pusat;

“**Hak**” ertinya milik, kepunyaan - kuasa atas sesuatu atau utk berbuat sesuatu (ditentukan oleh undang-undang agama, adat istiadat, dll)

“**Institusi Pendidikan Tinggi**” ertinya institusi pendidikan yang menyediakan pendidikan tinggi yang membawa kepada penganugerahan diploma, ijazah atau yang setaraf dengannya.

“**Jantina**” ertinya jenis kelamin (sama ada lelaki atau perempuan);

“**Kampus**” ertinya kepada kampus UNIMAS yang meliputi semua institusi, bangunan dan asrama universiti;

“**Kaum**” ertinya golongan orang sebagai sebahagian daripada satu bangsa yg besar atau suku bangsa;

“**Kesamarataan**” ertinya sifat atau keadaan sama rata atau sama sahaja (antara satu sama lain): mempersoalkan hak dan tanggungjawab, keadilan;

“**Pegawai**” ertinya seseorang yang diambil bekerja secara tetap, sementara atau kontrak oleh sesuatu badan berkanun, dan dibayar emolument oleh badan berkanun itu, dan termasuklah seseorang yang

dipinjamkan ke mana-mana perbadanan subsidiari atau syarikat badan berkanun itu atau mana-mana badan berkanun yang lain atau mana-mana Kementerian, jabatan atau agensi Kerajaan Persekutuan atau mana-mana jabatan atau agensi Kerajaan mana-mana Negeri atau mana-mana syarikat yang dalamnya Kerajaan Persekutuan atau Kerajaan mana-mana Negeri mempunyai kepentingan;

“**Pelajaran**” ertinya segala sesuatu yang dipelajari atau yang diajarkan;

“**Pelajaran Berkualiti**” ertinya sistem pendidikan yang berteraskan kurikulum pelajaran yang seimbang antara akhlak (etika dan nilai moral) dan ilmu (pengetahuan dan kemahiran); bagi melahirkan generasi muda yang mempunyai kemahiran untuk bersaing dalam pasaran tenaga kerja dan menjadi pemacu kepada perkembangan ekonomi Negara;

“**Pendidikan Tinggi**” ertinya pendidikan yang disediakan oleh institusi pendidikan tinggi;

“**Perlembagaan Persekutuan**” ertinya undang-undang utama Persekutuan dan apa-apa undang-undang yang diluluskan selepas Hari Merdeka yang tidak selaras dengan Perlembagaan ini, adalah tidak sah setakat ketidakselarasan itu atau undang-undang atau peraturan negeri, dasar pemerintah negeri;

“**Perlembagaan Universiti**” ertinya Perlembagaan Universiti Malaysia Sarawak;

“**Undang- Undang Pemerdagangan**” ertinya undang- undang persekutuan yang melaluinya sesuatu badan berkanun diperdagangkan.

5 TUJUAN

- 5.1 Dasar ini menjadi satu asas, teras, panduan, aturan atau satu bentuk pelan tindakan dalam memastikan tiadanya diskriminasi dan hak kesamarataan serta perlindungan kepada warga UNIMAS dipraktikkan tanpa mengira jantina, agama, bangsa dan usia. Semua orang termasuklah warga UNIMAS, berhak mendapat perlindungan daripada sebarang diskriminasi yang boleh menyebabkan ketidakpuasan hati,

perpecahan atau perbalahan antara kaum, bangsa dan lain-lain yang boleh mengakibatkan risiko ke atas UNIMAS dan negara.

5.2 Di dalam konteks UNIMAS, bagi mencapai tujuan ini, UNIMAS telah menggubal dan berhasrat untuk melaksanakan Dasar ini untuk menjamin dan memastikan Pendidikan yang berkualiti, yang disediakan oleh UNIMAS dapat dicapai dan dinikmati oleh segenap lapisan masyarakat, tanpa ada sekatan dan halangan. Selaras dengan misi ini juga, UNIMAS komited untuk menjana, menyebarkan dan menerapkan ilmu secara strategik dan inovatif bagi memperkasakan kualiti budaya bangsa dan kemakmuran masyarakatnya.

6. HAK KESAMARATAAN DAN PERLINDUNGAN DALAM KONTEKS UNIMAS.

6.1 Hak yang sama rata serta perlindungan yang diberikan kepada warga UNIMAS merangkumi hak dan perlindungan daripada apa sahaja jenis diskriminasi atau layanan berat sebelah terhadap warganegara semata-mata atas alasan agama, ras, keturunan, tempat lahir, mastautin atau jantina dalam mana-mana undang-undang atau dalam pelantikan kepada apa-apa jawatan atau pekerjaan, profesion, kerjaya di bawah sesuatu pihak berkuasa awam melainkan ia dibenarkan di dalam Perlembagaan.

6.2 Di dalam Perlembagaan Persekutuan 1957, telah diperuntukkan mengenai kebebasan asasi di bawah perkara 5(1) yang menyatakan bahawa, “Tiada seorang pun boleh diambil nyawanya atau dilucutkan kebebasan dirinya kecuali mengikut undang-undang.”

6.2.1 HAK KESAMARATAAN DAN PERLINDUNGAN DI SISI UNDANG-UNDANG

6.2.1.1 Perkara 8(1) memperuntukkan semua orang adalah sama rata di sisi undang-undang dan berhak mendapat perlindungan yang sama rata di sisi undang-undang. Prinsip yang ditekankan adalah hak ini bukanlah hak yang mutlak di mana masih tertakluk kepada undang-undang.

6.2.1.2 Tambahan lagi, di bawah Perlembagaan yang sama, turut diperuntukkan hak sama rata iaitu di bawah Perkara 8 (1) Kesamarataan yang mana, semua orang adalah sama rata di sisi undang-undang

dan berhak mendapat perlindungan yang sama rata di sisi undang-undang.

6.2.1.3 UNIMAS tidak mengamalkan dasar diskriminasi di mana segala peraturan, polisi, dan dasar yang diamalkan adalah mempunyai nilai kesamarataan yang mengekalkan konsep “*Natural Justice*” iaitu hak untuk didengar (*right to be heard*) dan perlindungan dari layanan berat sebelah (*rules against bias*) yang merangkumi perlindungan dalam aspek keselamatan, kebajikan, keadilan dari segi mengenakan hukuman yang setimpal dengan kesalahan ke atas pelaku dan lain- lain.

6.2.2 KESAMARATAAN DALAM MENIKMATI PENDIDIKAN BERKUALITI

6.2.2.1 UNIMAS menawarkan kesamarataan untuk memperolehi pendidikan berkualiti sebagaimana yang telah diperuntukkan Perlembagaan Persekutuan 1957, saranan di dalam *Malaysia Education Blueprint (2013-2025)* dan *Pelan Pembangunan Pendidikan Malaysia (2013-2025)* kepada masyarakat untuk memastikan bahawa setiap orang, tanpa mengira peringkat umur, jantina, agama dan kaum, diberikan ruang dan peluang bagi mendapatkan akses kepada Pendidikan berkualiti.

6.2.2.2 Hak untuk menikmati pendidikan yang berkualiti di UNIMAS tanpa diskriminasi dan berat sebelah adalah mengikut peruntukan yang tertakluk di bawah Perlembagaan Persekutuan 1957, dalam menjamin hak kebebasan untuk mendapatkan dan menikmati Pendidikan. Hak ini boleh dirujuk kepada Perkara 12 (1)(a) di bawah Perlembagaan yang dimaksudkan, seperti yang berikut:

12. (1) Tanpa menjejaskan keluasan Perkara 8, tidak boleh ada diskriminasi terhadap mana-mana warganegara semata-mata atas alasan agama, ras, keturunan atau tempat lahir—

(a) dalam pentadbiran mana-mana institusi pendidikan yang disenggarakan oleh suatu pihak berkuasa awam, dan, khususnya, kemasukan murid-murid atau pelajar-pelajar atau pembayaran fi;

6.2.2.3 UNIMAS mengamalkan konsep keterbukaan dalam kemasukan dan pengambilan pelajar bagi mengikuti pendidikan yang ditawarkan di UNIMAS kepada pelbagai kaum tanpa mengira agama, umur dan jantina, untuk melahirkan generasi muda yang berkemahiran agar berdaya saing dalam



pasaran tenaga kerja dan merupakan pemacu kepada perkembangan dalam ekonomi.

7. **KEKECUALIAN**

7.1 Dasar ini adalah berkuatkuasa secara menyeluruh dalam UNIMAS, kecuali jika konteks menghendaki maksud yang selain daripadanya mengikut keadaan dan kesuaiannya yang tertakluk kepada keadaan fizikal dan mental, tahap kesihatan, keupayaan dan kelayakan akademik dan kewarganegaraan.

7.2 Pengecualian ini dibuat atas dasar untuk melindungi mana- mana orang di UNIMAS dari segi keselamatan diri, mencegah kemudaratan kepada tubuh badan, pengukuran dan penetapan dari segi kompetensi yang merujuk kepada kemahiran dan kepakaran serta untuk langkah untuk menjaga kesejahteraan dan keharmonian warganegara Malaysia.

8. **PERNYATAAN LARANGAN DAN TEGAHAN**

8.1 Tiada mana-mana orang pun yang boleh dihalang atau ditegah atau dilarang sama sekali untuk menikmati dan mendapat perlindungan hak kesamarataan, kecuali sebagaimana yang diperuntukkan pada Perkara 7 di atas atau atas sebab kecuaiannya sendiri yang menyebabkan haknya itu terbatal, terabai atau dinafikan.

8.2 Mana-mana pelanggaran di dalam Dasar ini boleh mengakibatkan UNIMAS atau mana-mana orang yang bekerja dengannya, dikenakan tindakan melanggar peruntukan di bawah; -

- i. Perkara 5: Kebebasan Diri dan Perkara 8: Kesamarataan di dalam Perlembagaan Persekutuan 1957;
- ii. Seksyen 5 di bawah Jadual Pertama, Akta Universiti dan Kolej Universiti 1971 dan pada Seksyen 8 Perlembagaan Universiti Malaysia Sarawak 1998 mengenai perbezaan kerana ras dan kepercayaan adalah dilarang; dan
- iii. Tindakan tatatertib Ingkar Perintah di bawah Akta Badan-Badan Berkanun (Tatatertib dan Surcaj) 2000 (Akta 605); ke atas mana-mana staf Badan Berkanun yang didapati bersalah dan disabitkan atas pelanggaran tersebut, di mana pelanggaran itu mendatangkan kemudaratan dan mencemar imej UNIMAS.



9. **SEMAKAN DAN PINDAAN**

Dasar Kesamarataan Dan Perlindungan Ke Atas Warga UNIMAS Dari Segi Jantina, Agama, Bangsa Dan Usia UNIMAS ini adalah tertakluk kepada pindaan dari semasa ke semasa mengikut perubahan dalam Undang-Undang Malaysia iaitu Perlembagaan Persekutuan 1957, Akta Universiti dan Kolej Universiti (AUKU) 1971 (Pindaan 2009 dan 2012), Perlembagaan Universiti Malaysia Sarawak 1998 (Pindaan 2010 dan 2012) atau Dasar-dasar Kerajaan yang dipanjangkan melalui pekeliling-pekeliling, surat-surat pekeliling atau peraturan-peraturan yang berkuat kuasa dari semasa ke semasa.

10. **SUMBER RUJUKAN PERUNDANGAN**

- 10.1 Perlembagaan Persekutuan 1957.
- 10.2 Akta Universiti dan Kolej Universiti (AUKU) 1971 (Pindaan 2009 dan 2012).
- 10.3 Perlembagaan Universiti Malaysia Sarawak 1998 (Pindaan 2010 dan 2012).
- 10.4 Akta Badan- Badan Berkanun (Tatatertib dan Surcaj) 2000 (Akta 605).

11 **TARIKH KUATKUASA DAN PEMAKAIAN**

- 11.1 Dasar Kesamarataan Dan Perlindungan Ke Atas Warga UNIMAS Dari Segi Jantina, Agama, Bangsa Dan Usia di Universiti Malaysia Sarawak (UNIMAS) adalah berkuatkuasa sepenuhnya pada tarikh ianya diluluskan oleh Mesyuarat Jawatankuasa Eksekutif Bil.1/2020 ke-57 pada 10 Januari 2020.

